



pravosudna mreža
BOSNE I HERCEGOVINE
правосудна мрежа
БОСНЕ И ХЕРЦЕГОВИНЕ
justice network
OF BOSNIA AND HERZEGOVINA



forum građana tuzle



Helsinški odbor za ljudska prava
u Republici Srpskoj

NEWSLETTER BILTEN

Pokretanje Pravosudne mreže BiH inicirali su Forum građana Tuzle i Helsinški odbor za ljudska prava u RS, kao dio aktivnosti Projekta održivosti civilnog društva (CSSP). Osnovna svrha Mreže je doprinos nezavisnosti, efikasnosti, nepristrasnosti i samostalnosti bh. pravosuđa.

| Broj 22. |

NOVOSTI

Alternativni izvještaj za BiH 2016: politički kriteriji

Dragi čitaoci, ovdje vam nudimo preuzimanje i pregled četvrtog Alternativnog izvještaja za Bosnu i Hercegovinu na putu ka članstvu u Evropskoj uniji. Izvještaj predstavlja zajednički napor više desetina osoba i organizacija, čiji je zajednički cilj bio da se iz ugla organizacija civilnog društva predstavi aktuelno stanje integracija Bosne i Hercegovine.

Imajući na umu da je zvanični Izvještaj o napretku politički izvještaj Evropske komisije, smatramo da kroz objavljivanje Alternativnog izvještaja možemo uticati na njegov sadržaj. Upravo zbog toga, Alternativni izvještaj objavljujemo skoro tri mjeseca pred objavljivanje zvaničnog Izvještaja, u nadi da će to imati uticaja na formulisanje zvaničnog izvještaja.

Izvještaj je dostupan na ovoj linku:

http://www.mrezapravde.ba/mpbh/mpbh_files/file/mp-publikacije/19%20HRP_alternativni%20izvjestaj%202016_BHS.pdf

Položaj oštećenog u krivičnom postupku u Bosni i Hercegovini

U Sarajevu je održana radionica pod nazivom „Najbolje prakse u Evropskoj uniji za rješavanje imovinsko-pravnog zahtjeva u krivičnim postupcima“. Radionicu je realizovalo Visoko sudsko i tužilačko vijeće Bosne i Hercegovine (VSTV BiH) u saradnji sa Instrumentom za tehničku/savjetodavnu podršku i razmjenu informacija Generalne direkcije Evropske unije za politiku susjedstva i pregovore o proširenju (TAIEX).

Cilj radionice bio je razmjena znanja i iskustava između pravnih praktičara po pitanju naknade materijalne i nematerijalne štete u krivičnim postupcima.



USAID
FROM THE AMERICAN PEOPLE

Uvodničari su bili Mira Smajlović, sudija Suda Bosne i Hercegovine, Milanko Kajganić, tužilac Tužilaštva Bosne i Hercegovine i Nedžla Šehić, advokat iz Sarajeva, dok su međunarodni stručnjaci iz Švedske, Belgije i Italije prezentovali načine rješavanje ovog pravnog pitanja u državama iz kojih dolaze. Učesnici radionice su bili sudije, tužioci i advokati iz Bosne i Hercegovine, te predstavnici OSCE-a, EUSR-a i nevladine organizacije TRIAL koja se već duže vrijeme bavi ovom problematikom.

Radionica je ukazala na potrebu poboljšanja položaja oštećenog u krivičnom postupku, a naročito potrebu brzog obeštećenja osobe pogođene krivičnim djelom, što podrazumijeva dosuđivanje imovinsko-pravnog zahtjeva u okviru krivičnog postupka, kako bi se izbjeglo da oštećeni ovo svoje pravo pokušava ostvariti u, nerijetko, dugotrajnim i skupim parnicama.

Prezentirani primjeri iz zemalja Evropske unije su ukazali da tamošnji sudovi uglavnom dosuđuju odštetu u krivičnim postupcima, dok sudovi u BiH uglavnom ne rješavaju imovinsko-pravne zahtjeve, dijelom jer isti nisu dovoljno precizirani niti potkrijepljeni odgovarajućim dokazima, ali i zbog ustaljenog stava da će raspravljanje o imovinsko-pravnom zahtjevu značajno odugovlačiti rješavanje o krivičnoj stvari.

Učesnici radionice su se složili da je za promjenu ove prakse potrebno podići svijest o značaju i posljedicama blagovremenog rješavanja imovinsko-pravnog zahtjeva, te proaktivan pristup svih aktera u krivičnom postupku. Ovo se naročito odnosi na potrebu da se oštećenom, već u najranijoj fazi postupka, daju jasne instrukcije o ovom njegovom pravu, kako bi bio u prilici da postavi preciziran odštetni zahtjev i zajedno sa tužiocem pruži dokaze koji idu u korist ovome zahtjevu. Također je istaknuta potreba određivanja privremene mjere kojom bi se spriječilo otuđivanje imovine od strane optuženog, kako bi se oštećeni mogao namiriti.

Radionica je okončana praktičnim analizama slučajeva i zaključcima koji će biti veoma značajni za dalji rad učesnika radionice, kao i za cjelokupno pravosuđe u BiH.

Preuzeto sa www.pravosudje.ba

Novinari na radionici o izvještavanju iz krivičnog pravosuđa

U organizaciji Visokog sudskog i tužilačkog vijeća Bosne i Hercegovine u okviru projekta „Jačanje tužilačkih kapaciteta u sistemu krivičnog pravosuđa“, kojeg podržavaju Vlade Švicarske i Kraljevine Norveške, u Sarajevu je održana radionica za novinare o izvještavanju iz krivičnog pravosuđa, sa fokusom na izvještavanje o djelovanju tužilaštava u BiH.

Radionici su prisustvovali novinari iz radijskih i TV stanica, te printanih medija i web portala. Glavna kantonalna tužiteljica Kantonalnog tužilaštva Kantona Sarajevo Dalida Burzić i portparol ove institucije Azra Bavčić bili su edukatori na radionici.

Edukacija je održana kako bi se pružila podrška novinarima koji izvještavaju o pravosuđu u cilju boljeg razumijevanja pravosudnog sistema, pravne terminologije i komunikacijskih alata koji se koriste u bh. tužilaštvima i Kantonalnom tužilaštvu KS. Radionica je podrazumijevala interakciju, kroz razmjenu iskustava u saradnji medija i pravosudnih institucija.

Neke od tema koje su obrađivane tokom radionice bile su: organizacija pravosudnog sistema u BiH, nadležnosti i organizacija tužilaštava u BiH, uloga tužioca, tok i faze krivičnog postupka, komunikacija između medija i tužilaštva u različitim fazama krivičnog postupka, terminologija u krivičnom pravosuđu, etičko ili senzacionalističko novinarstvo i izazovi za novinare u saradnji sa tužilaštvima. Predstavljeni su brojni primjeri i analize slučajeva o izvještavanju medija o konkretnim predmetima u radu tužilaštva.

Izuzetan interes građana za mirno rješavanje sporova

Za samo dvije sedmice zaključene 833 sudske nagodbe

U periodu 3.-14. oktobra 2016. godine, na inicijativu Visokog sudskog i tužilačkog vijeća BiH (VSTV BiH), u svim prvostepenim i drugostepenim sudovima u BiH organizovane su „Sedmice sudske nagodbe“. Aktivnost je organizovana u okviru Projekta unapređenja efikasnosti pravosuđa II (Projekt), finansiranog od strane Kraljevine Norveške.

U toku održanih „Sedmica sudske nagodbe“, pred sudovima u BiH zaključeno je ukupno 833 sudske nagodbe, što je značajno više od mjesečnog prosjeka u prethodnom periodu. Ovaj broj čini 15% od ukupnog broja predmeta riješenih na ovaj način od početka 2016. godine do danas (5.626 predmeta riješenih sudskom nagodbom).

Najbolji uspjeh ostvarili su Općinski sud u Tuzli (147 sudskih nagodbi), Osnovni sud u Banja Luci (143) te Osnovni sud u Prijedoru (62), Osnovni sud u Gradišci (36) i Općinski sud u Sanskom Mostu (36).

Najveći broj sudskih nagodbi zaključile su sudije: Šefika Trnjanin, Općinski sud u Sanskom Mostu (36), Rukija Jusupović, Općinski sud u Tuzli (20), Dijana Mazalić-Nović, Osnovni sud u Prijedoru (18) i Gordana Stevandić Osnovni sud u Banja Luci (18).

Rezultati su pokazali da su za zaključenje sudske nagodbe najpogodniji predmeti koji se odnose na sporove nastale iz privrednih, ugovornih, radnih odnosa, te imovinsko-pravne sporove nastale iz porodičnih odnosa, među kojima treba izdvojiti predmete male vrijednosti i komunalne predmete.

VSTV BiH izražava zadovoljstvo ostvarenim rezultatima i poziva sve zainteresovane stranke, čiji se predmeti vode pred sudovima u Bosni i Hercegovini, da i u narednom periodu pristupe sudu te riješe svoj predmet sudskom nagodbom.

Cilj organizovanja „Sedmica sudske nagodbe“ jeste rješavanje što je moguće većeg broja predmeta mirnim putem, u skraćenom postupku, koji je ekonomičniji i brži za stranke. Promoviranjem mirnih načina rješavanja sporova, VSTV BiH želi izvršiti pozitivan utjecaj na efikasnost sudskih postupaka te promjenu pristupa suda i stranaka rješavanju sporova. Prioritet se postavlja na brzo i efikasno rješavanje, s akcentom na zadovoljstvo stranaka na ishod spora i uslugu suda.

Imajući u vidu ostvarene rezultate i iskazani interes stranaka, „Sedmice sudske nagodbe“ će biti organizovane periodično u okviru Projekta. VSTV BiH će, u saradnji sa sudovima, nastaviti sa promocijom mirnih načina rješavanja sporova i kontinuirano provoditi mjere koje utiču na efikasno procesuiranje predmeta.

Podsjećamo građane da ukoliko žele da svoj predmet riješe sudskom nagodbom to mogu učiniti tako što će informisati sudiju koji vodi predmet, na jedan od sljedećih načina:

- samostalno ili preko svog zastupnika upute pismeni prijedlog ili na drugi način iskažu inicijativu za zaključenje sudske nagodbe;
- zajedno sa suprotnom strankom, te zastupnikom ukoliko ga imaju, pristupe na sud sa prijedlogom za zaključenje sudske nagodbe.

Preuzeto sa www.pravosudje.ba

Održan sastanak predstavnika VSTV BiH i Ministarstva pravde i uprave Kantona Sarajevo

Predstavnici Visokog sudskog i tužilačkog vijeća BiH (VSTV BiH) ispred Projekta za unapređenje efikasnosti pravosuđa II (Projekat) održali su 19.10.2016. godine sastanak sa predstavnicima Ministarstva pravde i uprave Kantona Sarajevo.

Na sastanku su razmijenjene informacije o aktivnostima koje sa jedne strane provodi VSTV BiH, a sa druge Ministarstvopravde i uprave.

Predstavnici Ministarstva istakli su da u okviru svojih nadležnosti posvećuju posebnu pažnju unapređenju rada sudova sa posebnim akcentom na rješavanje problematike komunalnih predmeta u Općinskom sudu u Sarajevu.

Predstavnici VSTV BiH su istakli aktivnosti koje provode u cilju unapređenja efikasnosti rada sudova a naročito:

- aktivnosti u vezi sa uvođenjem Sistema za elektronsku obradu komunalnih predmeta u Općinski sud u Sarajevu;
- rezultate Projekta koji je implementiran u periodu od 2011. do 2016. godine;
- informacije o dosadašnjim finansijskim ulaganjima VSTV-a BiH u sudove u Sarajevu, prije svega u Općinski sud u Sarajevu;
- početak realizacije novog projekta koji će se, pored ostalog, fokusirati na reformu izvršnog postupka, promociju sudske nagodbe, jačanju prostornih kapaciteta i unapređenje organizacije rada i saradnje institucija pravosuđa;
- zakonodavnu inicijativu tj. izradu Analize izmještanja komunalnih predmeta iz sudova na javne ili privatne agencije, koja je usvojena na sjednici VSTV BiH.2015.godine i kao takva upućena nadležnim ministarstvima u dalju proceduru.

Iskazana je spremnost svih učesnika sastanka za otvorenu saradnju u cilju realizacije planiranih aktivnosti koje će doprinijeti očuvanju nezavisnog, nepristrasnog i učinkovitog pravosuđa u Bosni i Hercegovini, kao i koordiniranju reformskih aktivnosti u ovoj oblasti.

Preuzeto sa <http://vsts.pravosudje.ba/>

